



SIARAN MEDIA

PELANCARAN KLINIK PENYELESAIAN TUNGGAKAN KES PUSAKA PERINGKAT NEGERI KEDAH

Berikutan jumlah tunggakan kes pusaka dan permohonan semasa yang meningkat setiap tahun amatlah membimbangkan dan pada masa memahami isu harta pusaka adalah satu isu dekat di hati rakyat, Kementerian Tenaga dan Sumber Asli (KeTSA) mengambil langkah proaktif dengan melancarkan program Klinik Penyelesaian Tunggakan Kes Pusaka.

Program yang diadakan hari ini di Sik, Kedah bertujuan memberi konsultasi dan penerangan mengenai kaedah pengurusan harta pusaka kepada pelanggan dan orang awam yang hadir.

KeTSA juga berharap kerjasama erat bersama dengan pentadbiran Kerajaan Negeri Kedah dalam penyelesaian isu harta pusaka ini dapat mengurangkan tunggakan kes pembahagian pusaka yang dihadapi oleh waris di Negeri Kedah dengan kadar segera.

Pindaan Akta Harta Pusaka Kecil (Pembahagian) (Pindaan) 2021 telah dibentangkan dan diluluskan di Parlimen pada 22 Disember 2021. Pindaan ini antaranya meluaskan bidang kuasa Jabatan Ketua Pengarah Tanah dan Galian Persekutuan (JKPTG) dalam pengurusan pusaka kecil dengan peningkatan nilai bidang kuasa daripada RM2 juta kepada RM5 juta selari dengan peningkatan nilai hartanah semasa. Sehubungan itu, ia dilihat dapat membantu rakyat tanpa perlu membawa kes pembahagian ke Mahkamah yang pastinya memerlukan kos khidmat guaman yang tinggi.

Sebelum pindaan dikuatkuasakan, terdapat keperluan bagi pihak Kerajaan menggunakan segala kapasiti yang ada termasuk usaha sama antara Kerajaan Persekutuan dan Kerajaan Negeri untuk menyegerakan penyelesaian tunggakan kes pusaka. Sehingga Disember 2021 didapati tunggakan kes pusaka di negeri-negeri keseluruhannya berjumlah 72,348.

Isu tunggakan kes pusaka yang tinggi khususnya bagi negeri Kedah perlu diberikan tumpuan terutama sejak dua tahun kebelakangan ini. Ia berikutan proses perbicaraan yang telah tertangguh bagi satu tempoh agak panjang apabila dunia dilanda pandemik COVID-19.

Antara program yang dirancang bagi penyelesaian isu tunggakan adalah dengan mendapatkan input di peringkat lapangan melibatkan program turun padang bersama rakyat. Malah pertemuan bersama ketua-ketua komuniti secara langsung dapat memberikan maklumat mengenai permasalahan yang dihadapi rakyat dalam urusan pentadbiran harta pusaka.

Usaha sama berterusan antara pihak Kementerian dan Kerajaan Negeri Kedah secara khusus bagi menangani isu tunggakan kes harta pusaka akan dilaksanakan melalui penubuhan *Task Force*. Ini melibatkan penugasan kepada pegawai Unit Petugas Khas JKPTG bersama Pentadbir Tanah Negeri Kedah untuk membantu perbicaraan kes, di samping menyediakan kemudahan infrastruktur dan penyelarasan pemakaian sistem kelak.

YB DATUK SERI TAKIYUDDIN BIN HASSAN
MENTERI TENAGA DAN SUMBER ASLI

14 FEBRUARI 2022

Unit Komunikasi Korporat | Kementerian Tenaga dan Sumber Asli
No. Tel. : 03-8000 8000 | Faks : 03-8889 4763 | Web : www.ketsa.gov.my



KeTSAMalaysia



ketsa.malaysia



KeTSAMalaysia